

元代史書



元史
初編

元代史書 四卷

元
代
史料
叢刊
初編

黃山書社

列傳第八十五

新元史卷之一百八十八

賜進士出身日講起居注官翰林院侍讀國史館纂修膠州柯劭忞撰

王 惲 遜志

高 鳴

王思廉 荆玩恒

馬 紹

閻 復

王 倚

高克恭

夾谷之奇

臧夢解

燕公楠

白 恪

李 衍

張伯淳

王惲字仲謀衛輝汲縣人父天鐸金戶部主事著易學集說爲名儒惲好學善屬文史天澤將兵過衛一見接以賓禮中統元年左丞姚樞宣撫東平辟爲詳議官時省府初建令諸路各上儒吏能理財者一人惲以選至京師上書論時政與渤海周正並擢爲行中書省詳定官二年春從行中書省丞相禡禡等赴開平轉翰林修

撰同知制誥兼國史院編修官尋兼中書省左右司都事初高麗國相致書於省府欲命惲爲荅書惲曰境外之交非人臣所宜范仲淹諭元昊尙得罪於仁宗可以爲戒乃止至元五年建御史臺拜監察御史條奏百五十餘事時都水劉晟陷沒官糧四十餘萬石惲劾之又言晟監修太廟轉官受賞今纔數年梁柱摧朽事涉不敬宜論如法秩滿陳天祐雷膺交薦於朝九年授平陽路總管府判官初絳州太平縣民殺其兄蔓引逮繫者三百餘人五年不決朝廷委惲鞠之一訊而服乃盡出逮繫者州久旱一夕大雨十三年奉命試儒人于河南十四年除翰林待制拜朝列大夫河南江北道提刑按察副使尋遷燕南河北道十八年拜中議大夫行御史臺治書侍御史下赴裕宗在東宮惲進承華事略其目曰廣孝立愛端本進學擇術謹習聽政達聰撫軍崇儒親賢去邪納誨幾諫從諫推恩尙儉戒逸明分審官凡

二十篇裕宗覽而善之賜酒慰喻十九年春改山東東西道提刑按察副使在官一年以疾告二十二年春召爲左司郎中時右丞盧世榮以聚斂進用屢趣惲入都不赴或問其故惲曰力小任大剝累利已未有能全者遠之尙恐見浼况近之乎旣而果敗二十六年授少中大夫福建閩海道提刑按察使黜官吏貪汙者數十人察繫囚冤滯者決而遣之戒戍兵無寓民家創營房居之惲以爲治之本在於得人矣福建連山距海爲邊徼重地今行省官平章政事左丞尙缺宜選清望素著簡在帝心足以撫綏黎庶折衝外侮者任之又以行省討劇賊鍾明亮無功條陳利害帝並建之二十八年召至京師二十九年春見帝於柳林行宮上書極陳時政授翰林學士成宗卽位又獻守成事鑑十五篇所論悉本於經義元貞元年加通議大夫知制誥同修國史纂修世祖實錄因集聖訓六卷上之大德元年進中奉大夫

二年以憚與閻復等十二人清貧守職各賜鈔二千一百餘錠乞致仕不許五年再上章求退授其子公孺爲衛州推官以便養仍官其孫筈秘書郎八年六月卒贈翰林學士承旨資善大夫追封太原郡公諡文定著有相鑑五十卷汲郡志十五卷承華事略中堂事記烏臺筆補玉堂嘉話并雜著詩文合爲秋澗集一百卷曾孫遜志

遜志字文敏以廕授侍儀司通事舍人累遷監察御史劾奏詹事卜蘭奚平章政事宜童皆逆臣子孫當屏諸遐裔不報除太府少監出爲江西廉訪副使召僉太常禮儀院事京師陷百官出降遜志獨家居衣冠而坐其友中正院判官王翼來曰新朝寬大不惟不死且錄用曷詣官自陳遜志慨然曰君既不忠又誘人爲不義耶搗之出語其子曰汝速行以繼吾宗遂自投井中死高鳴字雄飛真定人少以文學知名元好問薦於世祖

未報諸王旭烈兀將征西域聞其賢遣使三召之鳴乃起條上二十餘策旭烈兀稱善薦爲彰德路總管政暇卽詣學舍親講經義郡人知有經學自鳴始世祖卽位賜詔命金符召爲翰林學士兼太常少卿至元五年立御史臺以鳴爲侍御史臺章多其裁定尋立四道按察司選任名士鳴所薦居多時中書樞密事務壅滯言者請置都事官各二人鳴曰臣職在奉憲願舉察之毋庸員外置人七年議立三省鳴上封事曰臣聞三省設自近古其法由中書出政移門下議不合則有駁正或封還詔書議合則還移中書中書移尙書尙書乃下六部郡國方今天下大於古而事益繁取決一省猶恐壅滯况三省乎且多置官者求免失政也但使賢俊萃一堂連署參決自不至於曠廢豈必別官異坐而後無失政乎不如一省便世祖深然之議遂罷川陝盜起省臣請專戮其尤者朝議將從之鳴諫曰制令天下上死囚

必待論報所以重用刑惜民命也今從其請是開天下擅殺之路害仁政甚大帝曰善令速止之鳴每以敢言被上知嘗入內值大風雪帝謂御史大夫塔察兒曰高學士年老後有大政就問可也賜太官酒肉慰勞之九年遷吏禮部尙書十一年病卒年六十六諡文獻著有河東集五十卷三子易訓書訓詩訓俱知名書訓官應奉翰林文字同知制誥兼國史院編修

王思廉字仲常真定獲鹿人幼師太原元好問旣冠張德輝宣撫河東辟掌書記謝病歸至元十年董文忠薦於世祖帝問文忠曰汝何由知其賢對曰鄉人之善者稱之遂召見授符寶局掌書十三年姚樞舉爲昭文館待制遷奉訓大夫符寶局直長十四年改翰林待制嘗進讀通鑑至唐太宗有殺魏徵語及長孫皇后進諫事帝命內官引至皇后閣講之后曰是誠有益爾宜擇善言進講勿以瀆辭煩上聽也每侍讀帝命御史大夫王

速帖木兒大師月赤察兒御史中丞撒里蠻翰林學士承旨掇立察等咸聽受焉帝嘗御延春閣大賚羣臣命十人爲列以進思廉在衛士之列帝責董文忠曰思廉儒臣豈宜列衛士中十八年進典瑞少監十九年帝幸白海時千戶王著矯殺奸臣阿合馬於大都辭連樞密副使張易帝召思廉至行殿屏左右問曰張易反若知之乎對曰未詳帝曰反已何未詳也思廉徐奏曰僭號改元謂之反亡入他國謂之叛羣聚山林賊害民物謂之亂張易之事臣實不知帝曰朕自卽位以來如李璫之不臣豈以我若漢高祖趙太祖遽陟帝位者乎思廉曰陛下神聖天縱前代之君不足比也帝歎曰朕往者有問於竇默其應如響蓋心口不相違故不思而得朕今有問汝能然乎且張易所爲張文謙知之否思廉曰文謙不知帝曰何以明之對曰二人不相能臣故料其不知因此文謙獲免二十年遷太監裕宗居東宮思廉

進曰殿下府中宜建學官令左右近侍皆親正學必能裨輔明德裕宗然之裕宗欲買甲第賜思廉思廉固辭二十三年改嘉議大夫同知大都留守兼少府監事乃頗叛帝親征思廉謂留守段貞曰藩王反側地大故也漢趙錯削地之策實爲良圖盍爲上言之貞白其事於帝帝曰汝何能出是言貞以思廉對帝嘉之二十九年遷正議大夫樞密院判官成宗卽位遷中奉大夫翰林學士仍樞密院判官以病歸三年起爲工部尙書拜征東行省參知政事七年總管大名路八年召爲集賢學士十一年授正奉大夫太子賓客仁宗卽位以翰林學士承旨資善大夫致仕延祐七年卒年八十三歲贈翰林學士承旨資德大夫河南江北等處行中書省右丞上護軍追封恒山郡公諡文恭初思廉官符寶局有荆玩恒與思廉齊名世祖嘗謂荆王二人可爲司符寶者師表云

玩恒字文紀趙州甯晉人少從李治受學張文謙薦爲
興文署校理遷符寶局直長擢典瑞監丞遷少監世祖
以符寶國之重器擇儒臣慎密者掌之得玩恒以爲稱
職故玩恒在典瑞監十三年不遷他官後出爲淮東道
提刑按察使改肅政廉訪使時徹里爲江浙行省平章
政事玩恒奏言奸臣桑哥倚勢弄權衆皆懼伏獨近侍
徹里不避雷霆之怒言於陛下卒使奸臣伏辜臣素知
其人進退不苟有大臣蹇諤之風宜置於朝廷使獻可
替否弼成大業時世祖已不豫遂召還徹里侍醫藥成
宗卽位改遼東道肅政廉訪使致仕卒諡端敏子訥右
衛屯田千戶

馬紹字子卿濟州金鄉人從上黨張播學丞相安童奏
言宜得儒士講經史以資見聞平章政事張啟元以紹
應詔授左右司都事出知單州民刻石頌德至元十年
僉山東東西道提刑按察司事益都甯海饑紹發粟賑

之十三年移僉河北河南道提刑按察司事未行屬江淮甫定選官撫治遷同知和州路總管府事十九年詔割隆興爲東宮分地皇太子選署總管未幾入爲刑部尙書萬億庫吏盜絨四兩時相欲置之重典紹言物情俱輕宜貸減乃決杖釋之河間李移住妄言惑衆謀爲不軌紹被檄按問多所全活二十年擢參議中書省事二十二年改兵部尙書踰年復爲刑部尙書二十四年分立尙書省拜參知政事賜中統鈔五千緡時更印至元鈔前信州三務提舉杜璠言至元鈔公私不便平章政事桑哥怒曰杜璠何人敢沮吾鈔法耶欲當以重罪紹從容言曰國家導人使言言可采用之不可采亦不之罪今重罪璠豈不與詔書違戾乎璠得免罪進尙書左丞邊卒有過支廩米者有司以聞帝欲究問紹言方邊庭用兵罪之懼失將士心所支踰數者當明年之數可也從之海都作亂其民來歸者七十餘萬散居雲朔

問桑哥議徙之內地紹持不可桑哥怒曰馬左丞愛惜漢人欲令餒死此輩耶紹徐曰南土地煥北人居之慮生疾疫若恐餒死曷若計口給羊馬之資俾還本土言有異同丞相何以怒爲宜取聖裁乃奏聞帝曰馬秀才所言是也桑哥集諸路總管三十人導之入見欲以趣辦財賦之多寡爲殿最帝曰財賦辦集非民力困竭必不能然朕之府庫豈少此哉紹退錄聖訓付史官書之時議增鹽課紹獨力爭山東課不可增議增賦紹曰苟不節浮費雖重斂數倍亦不足也事獲寢都城種苜蓿地分給居民省臣因取爲己有以一區授紹紹獨不取桑哥欲奏誦賜紹辭曰紹以非才居政府恒憂不能塞責詎敢微非分之福以速罪戾桑哥敗索其行賂之簿閱之獨無紹名桑哥曰使吾早信馬左丞之言必不至今日之禍帝曰馬左丞忠潔可尙其復舊職尙書省罷改中書左丞居再歲移疾還家元貞元年遷中書右丞

行江浙省事大德三年移河南省明年卒

閻復字子靜其先平陽人後徙於高唐州復始生有奇光照室幼入東平府學師事名儒康暉嚴實招諸生肄進士業延元好問校試四人中選復爲首徐琰李謙孟祺次之時稱東平四傑憲宗九年行臺辟爲書記遷御史臺掾至元八年用王磐薦授翰林應奉文字充會同館副使兼接伴使扈駕上都應制賦詩寓規諷之意帝顧和禮霍孫曰有才如此何可不用擢翰林修撰十四年出僉河北河南道提刑按察司事十六年入爲翰林直學士以州縣學官多不稱職建議定銓選之法累遷侍講學士兼集賢侍講學士兼領會同館事二十三年擢翰林學士改集賢學士二十八年尙書省罷帝召對便殿諭以卿爲執政官何如復謝不勝任帝謂左右曰讓爲美事勿強之遷浙西道肅政廉訪使先是桑哥當國復被命撰桑哥輔政碑至是桑哥敗詔有司路其碑

復亦坐免官成宗卽位詔舊臣入朝除集賢學士階正議大夫疏言京師宜建孔子廟用釋奠雅樂從之又言宜復曲阜縣守塚戶其後詔賜孔林灑掃二十八戶田五千畝皆由復之請云三年因星變條上十九事帝賜鈔弊旌之大德元年仍遷翰林學士三年帝召至榻前密問曰左丞相缺孰可代者復薦哈剌哈孫帝大悅拜翰林學士承旨階正奉大夫武宗卽位復奏上三事曰惜名器明賞罰擇人才未幾復怨家以飛語上聞帝怒事且不測執政曲爲營解始命復以老致仕進榮祿大夫遙授平章政事給半俸終養仁宗卽位遣使召復以病辭皇慶元年卒年七十七復以文學知名然高自矜詡不喜獎誘後進士論以是少之旣卒復婦弟淮東宣慰使李處恭方爲吏部侍郎慨然曰豈可使閭公無以易名請於朝贈光祿大夫大司徒上柱國永國公諡文康有靜軒集五十卷子嗣慶威州知州

王倚字輔臣本東萊人後徙宛平祖溫主管京城課稅倚讀書務躬行不事章句世祖選良家子入侍東宮倚年弱冠在眾中儀觀獨偉太保劉秉忠器之卽以充選倚侍皇太子日見信任凡時政所急知無不言是時宮職未備皇太子湯沐邑地廣事繁乃拜倚工部尙書行本位下隨身民匠都總管至元二十一年置東宮官屬拜家丞又置備用司掌貨幣出納令倚兼之後以倚辭職仍給家丞祿終養倚固辭方許之二十六年皇孫出鎮懷孟帝選舊臣護之乃以屬倚陛辭帝曰之良久謂侍臣曰倚修潔人也左右皇孫得人矣未幾從皇孫召還二十八年授禮部尙書以疾辭皇太子妃召見問曰人皆求進卿獨求退何也對曰臣見宮廷舊人如臣等者十去八九臣蒙恩最厚願留侍皇孫備宿衛間者賢之明年卒年五十三贈正義大夫禮部尙書追封太原郡侯諡忠肅子鵬翼樣局總管官至大司徒追封太原

郡侯諡忠懿

高克恭字彥敬其先西域人後占籍大同父亨字嘉甫治易詩書春秋有時名世祖時臺省交章論薦召對便殿稱旨世祖欲官之固辭歸老房山卒克恭傳家學於羣經奧義靡不研究至元十二年由京師貢補工部令史江南平選投行臺掾從御史大夫相威入覲世祖顧問再三曰是高嘉甫兒耶賜鈔二千五百貫累遷河南道提刑按察使判官改山東西道二十五年入爲監察御史是時桑哥秉政擢克恭右司都事克恭棘棘不阿明年遣使江淮行省考覈簿書文法吏多希旨務從深刻克恭獨持以平恕還授兵部郎中出爲江淮行省左右司郎中儒戶例蠲徭役而故籍散失行省持論可否期歲不能決克恭至命讀書者皆占儒籍得自拔於氓隸士論翕然頌之浙西公田七十五萬頃糧千一百三十九石居諸路三之二克恭視民所輸較私田增二十